

## Verðlaunaveiting

**Ávarp Einars Þorbjörnssonar, formanns Stjórnar Verðlauna- og styrktarsjóðs Rótarý á Íslandi.**

**Flutt á Umdæmisþingi á Ísafirði 14.-15. September 2012**

Ágætu samkomugestir.

Verðlauna- og styrktarsjóður Rótarý á Íslandi var stofnaður 9.júní 2007 með sameiningu tveggja sjóða þ.e.a. Starfsgreinasjóðs umdæmisins , sem stofnaður var í tilefni af 50 ára afmæli umdæmisins 13. september 1984 og Styrktarsjóðs Rótarý á Íslandi, sem stofnaður var 2003. Stofnfé var kr. 12.000.000,-. Aðeins ein viðurkenning hefur verið veitt úr Verðlauna- og styrktarsjóði Rótarý á Íslandi frá stofnun hans til Populas tremula menningarsmiðjunnar á Akureyri í júní 2008. Skýring þessa að ekki var veitt úr sjóðnum fyrr en nú er sú að talsvert fé tapaðist við bankahrunið en sjóðurinn var í vörslu Landsbanka Íslands. Stjórn sjóðsins ákvað að veita ekki styrk úr sjóðnum fyrr en eign sjóðsins hafi náð raungildi stofnfjár.

Tryggvi Pálsson, fráfarandi umdæmisstjóri, starfsárið 2011-2012 lagði fyrir Umdæmisráð 28.febrúar 2012 tillögu Ólafs Nilssonar formanns Fjárhagsráðs að Umdæmissjóður legði Verðlauna- og styrktarsjóði til eiginfjárframlag af eigin fé sínu 5.000.000,- kr. á starfsárinu 2011-2012. Fjárhæðin verði greidd á fimm árum ein og hálfmilljón króna við samþykki þessarar tillögu á árinu 2012 og síðan einmilljón króna árlega á næstu þremur starfsárum og 500.000,- kr. á síðasta árinu. Ógreiddur hluti framlagsins á hverjum tíma skal verðtryggður samkvæmt neysluvísitölu miðað við grunnvísitölu við samþykki tillögunnar og ber vexti í samræmi við innlásvexti af verðtryggðum reikningum í viðskiptabanka umdæmisins.

Tryggva og Ólafi er þakkað fyrir að hafa gengið framfyrir skjöldu og gera það kleift að Rótarýhreyfingin láti áfram til sín heyra með því að veita reglulega viðurkenningu fyrir framúrskarandi og nýstárlegt framtak sem unnið er í okkar þjóðfélagi eins og gert er ráð fyrir í skipulagsskrá Verðlauna- og styrktarsjóðsins.

Eins og þáttakendur á Umdæmisþinginu hafa getað séð á samþykktum Samstæðureikningum Rótarýumdæmisins fyrir starfsárið 2011-2012 er eigið bundið fé Verðlauna- og styrktarsjóðs 30.júní sl.

17,5 milljónir króna, og er raungildi stofnfjár frá 1.júlí 2007 þar með óskert eins og skipulagsskrá sjóðsins segir til um og frjálst eigið fé er 2,3 milljónir króna.

Með þetta í huga ákvað stjórn Sjóðsins á fundi sínum 11.september sl. að úthluta einni milljón króna styrk þetta árið og áætlanir sýna að svipuð upphæð verði veitt héðan í frá árlega.

Það hafði tíðkast í tíð Starfsgreinasjóðsins frá 1985 til 2007 að leitað var eftir hæfum styrkþegum í heimabyggð þess Rótarýklúbbs er hélt Umdæmisþingið. Þetta reyndist vel og vel séð og var því kallað efir hugsanlegum styrkþegum af svæði Ísafjarðarklúbbsins er fullnægðu skipulagsskrá Verðlauna- og styrktarsjóðsins.

En „*Tilgangur sjóðsins er að veita viðurkenningu fyrir framúrskarandi eða nýstárlegt framtak, sem unnið er að í umdæminu á sviði mennta, lista, vísinda eða atvinnumála*“

Stjórn sjóðsins barst nöfn tveggja atvinnufyrirtækja, sem skarað hafa fram úr undanfarin ár hvort á sínu sviði. Stjórn sjóðsins samþykkti á fundi sínum 11.september sl. samhljóða að veita hvoru fyrirtækjanna styrk að upphæð kr. 500.000,-

Styrkþegar að þessu sinni eru:

**Fossadalur ehf. á Ísafirði**

**og**

**Skútusiglingar ehf. (Borea Adventures) á Ísafirði.**

Áður en ég kalla fulltrúa þessara tveggja styrkþega hingað á svið, ætla ég að gera nokkra grein fyrir því frumkvöðlastarfi, sem þar hefur verið unnið, og hvað varð til þess að stjórnin tók þessa ákvörðun.

Fossadal ehf

er veitt viðurkenning Verðlauna- og styrktarsjóðs Rótarý á Íslandi fyrir frumkvöðlastarf í iðnaði.

Steingrímur Einarsson rennismiður og fiskeldisfræðingur, sem ólst upp við Sogið í Grímsnesi, ákvað fyrir fimm árum eða árið 2007 að stofna fyrirtækið Fossadalur ehf til hönnunar, þróunar og markaðssetningar fluguhjóls með byltingarkenndu bremsukerfi, sem skapar nú fjórum mönnum atvinnu á Ísafirði.

Hjólin eru smíðuð úr áli frá Alcoa. Álklumpar frá Alcoa eru sagaðir niður og mótaðir í vélum svo úr verður luxusvara.

Kjarni verkefnisins , sem unnin hefur verið í samstarfi við

Nýsköpunarsjóði Íslands með styrk frá Tækniþróunarsjóði Rannís, er að hanna og þróa búnað til að mýkja og geyma orku er verður til þegar fiskur tekur og rykkir í línuna.

Á Íslandi stunda ríflega 70 þúsund Íslendingar stangveiði í ám og vötnum á hverju ári. Fossadalur hefur þegar markaðsett fluguveiðihjól sem út frá verði og hönnun keppir við það sem best gerist og hefur skýra framtíðarsýn. Markmið fyrirtækisins er að byggja upp framleiðslu hérlendis á hágæða fluguveiðihjólum, en slík framleiðsla er hugsuð sem byrjun á markaðssetningu hágæða stangveiðivara. Með tæknilegu forskoti gefst tækifæri til að ná fótfestu á markaði meðal stórra markaðsráðandi fyrirtækja á krefjandi markaði útivistarvara.

Ný vörulína , sem kynnt var í apríl 2011, á veiðihjólinu Invictus ( latína og stendur fyrir ósigrandi), mun skjóta föstum fótum undir rekstur Fossadals, keppa við innflutning, skapa hátæknistörf og útflutningstekjur.

Unnið er að því að afla einkaleyfis er lýtur að nýrri hönnun þessa byltingarkennda bremsukerfis í veiðihjól en hjól með slíkum búnaði eru dýr og kosta um 120 þúsund krónur stykkið. Prófanir hafa farið fram víða og auk Íslands verða hjólin prófuð í Rússlandi, Noregi og í sjávarveiði á Kúbu.

Fossadalur framleiðir einnig ódýrari hjól í ýmsum stærðum og litum, þó engin undir 60 þúsund króna.

90% hjóla Fossadals eru seld til útlanda og markmið fyrirtækisins að selja þúsund stykki í ár.

Heimsmarkaðurinn er gríðarstór en bara í Bandaríkjunum seljast 600 þúsund hjól á ári.

Rekstur fyrirtækisins er umhverfisvænn.

Til hamingu Steingrímur og samstarfsmenn þínir.

Megi ykkur vegna sem best.

Má ég biðja Jón Pál Hreinsson í fjarveru Steingrím að koma hér upp og taka við Viðurkenningaskjali Verðlauna- og styrktarsjóðs Rótarý á Íslandi og ávísun upp á hálfa milljón með þökkum fyrir vel unnið starf.

Skútusiglingum ehf.

er veitt viðurkenning Verðlauna- og styrktarsjóðs Rótarý á Íslandi fyrir frumkvöðlastarf í ferðaþjónustu.

Sigurður Jónsson og Rúnar Óli Karlsson stofnuðu fyrirtækið 2006. Í þeim tilgangi að brydda upp á nýbreytni í ferðaþjónustu festu þeir kaup á 60 feta skútu er ber nafnið Aurora og tekur 8-10 farþega. Hjá fyrirtækinu á Ísafirði starfa 9 manns.

Markaðssetning fyrirtækisins fer fram í nafni Borea Adventures. Í kynningu þeirra kemur fram að fylgt er hugmyndafræði sjálfbærrar ferðaþjónustu og býður ævintýraþyrstum ferðalöngum upp á seglskútusiglingar um Vestfirði og austurströnd Grænlands. Þeir félagar komu með vörumerkið North Explores 2010 og er hluti af Borea Adventures en mun sjá um allar dagsferðirnar og lengri kajakferðir.

Til að skjóta enn frekar stoðum undir reksturinn keyptu þeir félagar 2011 farþegabátinn Bjarnarnes IS75 og munu með því hasla sér völl í annari tegund ferðamennsku til viðbótar skútusiglingum.

Sigurður Jónsson og Rúnar Óli Karlsson eru báðir innfæddir Ísfirðingar og hafa margra ára reynslu af siglingum, bátum og kajökum á svæðinu ásamt fjallaklifri og skíðaferðum á Íslandi og víðar. Menn með reynslu. Réttir menn á réttum stað.

Sigurður Jónsson, skipstjóri er með alþjóðleg réttindi til farþegaflutninga á skútum (Yachtmaster) og menntaður sem skipaverkfræðingur.

Rúnar Óli Karlsson er með gráðu í landafræði og hefur starfað sem fjallaleiðsögumaður og í fjallabjörgunarsveitum.

Markaðsetning fyrirtækisins á afþreyingu til erlendra markhópa er farin að bera árangur og hafa þeir notið styrkja við það dýra uppbyggingarstarf og farið að skila útflutninstekjur.

Ferðir frá Ísafirði til Grænlands eru orðnar vinsælar meðal útlendinga og er Aurora nýlega komnin úr einni slíkri er tók einn og hálfan mánuð.

Rekstur fyrirtækisins er umhverfisvænn.

Til hamingju Sigurður og Rúnar og samstarfsmenn ykkar.

Megi ykkur vegna sem best.

Má ég biðja þá Rúnar Óla Karlsson og Ásgerði Þorleifsdóttur framkvæmdastjóra Skútusiglinga að koma hér upp og taka við Viðurkenningaskjali Verðlauna- og styrktarsjóðs Rótarý á Íslandi og ávísun upp á hálfa milljón með þökkum fyrir vel unnið starf. Sigurður Jónsson er fjarverandi.

Ég þakka fyrir.